



UKA 2017/21
09. oktober 2017
Aaja Chemnitz Larsen

Namminersorlutik Oqartussat missingiummut uunga isumaqataanissaat pillugu Inatsisartut aalajangiiffigisassaattut Siunnersuut. Kalaallit Nunaanni pinerluttulerinermi inatsimmut allannguutissatut siunnersuut. (Kinguassiuutitigut pinerluttarneq il.il.)

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Inuit Ataqatigiit pinerluttaalisitsineq pillugu inatsimmi eqqartuussisarnerlu pillugu inatsimmi allannguutissat kinguaassiuutitigut pinerliivigineqarsimasut inatsisitigut illersugaanerannik pitsannguisuuneri pissutigalugit taperserpaat, Inuit Ataqatigiillu isumaat naapertorlugu tamanna pissusissamisoorpoq. Taamaalilluta kinguaassiuutitigut pinerluuteqarneq pillugu Kalaallit Nunaanni malittarisassat sukateriffigineqarlutik, Qallunaat Nunaanni pitsanngorsaatinik malinnitsinneqarnerat pillugu Kalaallit Nunaanni Eqqartuussiviit pillugit siunnersuisooqatigiit taperserpavut.

Inatsisinik allannguinerit nutarterinerupput, kinguaassiuutitigullu pinerliivigineqartut illersorneqarnerisa saniatigut, ullutsinnut naleqqunnerusunik oqaatsinik atuinernik qulakkeerisuullutik. Inatsisinik allannguineritigut meeqqanik, tassani meeravissiat ilanngullugit, kinguaassiuutitigut atornerluinerup pinerlunnerunerata erseqqissarneqarnera Inuit Ataqatigiit nuannaarutigaa. Taamattaq aapparisanik pinngitsaaliilluni atoqateqarnerit pinerlunninngortinneqarnerat nuannaarutigaarput.

Inatsisinik allannguinerit suliarineqarnerannut atatillugu illersuisoqalersinnaanermut periarfissap ammaassivigineqarsinnaanerata eqqarsaatersuutigineqarnissaa, ataatsimullu isigalugu pinerliivigineqartut eqqartuussinissap tungaanut, eqqartuussinerullu nalaani inatsisitigut illersugaanerisa qanoq nukittorsarneqarsinnaanera eqqarsaatersuutigineqassasoq Inuit Ataqatigiit isumaqarput. Inuit Ataqatigiit meeqqat kinguaassiuutitigut atornerlunneqarsimasut katsorsarneqartarnerat pillugu siunnersuummik, ukiaq manna kingusinnerusukkut Inatsisartuni suliarineqartussamik saqqummiussipput, isumarpummi naapertorlugu kinguaassiuutitigut atornerlunneqarsimasut, atornerlunneqarnermik kingorna ikiorserneqartarnissaat pingaaruteqarpoq.

Ukiukitsut piffissami sivilisuumi inersimasunik, ukiukitsup najugaqatigisaanik, atoqateqartarnerannik assersuutit aarlerilersitsipput, Inuit Ataqtigiiinnit isumaqarpugut tamanna inatsisissatut siunnersuummi inaarutaasumi ilanngullugu eqqarsaatigineqartariaqartoq.

Tunissutinik akiliilluni atoqateqartarnerup atortittarnissamullu kajumissaarinerit pinerlunninngortinneqarnissaat Inuit Ataqtigiiit taperserpaat. Taamattaq pornonik assilisanik atuilluni akiniaasarnerit erseqqissumik sinaakkuserneqarnissaannik siunnersuuteqarneq Inuit Ataqtigiiit taperserpaat.

Justitsministeriap inatsisissatut siunnersuummi suliat amerlinissaasa naatsorsuutigineqarnerat oqaatigaa, Inuit Ataqtigiiillu tassunga atatillugu ulluimikkut eqqartuussivinni piffissaq sivilisooq utaqeqqaarluni suliaassat ingerlanneqartussanngortinneqartareernerat erseqqissaatigissavaat. Kalaallit Nunaanni Eqqartuussiviup eqqartuussisoqarfiillu suliaassaminnik pisariitsumik pitsaasumillu naammassinnissinnaanerit anguniarlugu isumalluutinik naapertuuttunik peqartuarnissap eqqummaariffigineqarnissaa pingaaruteqarpoq.

Inuiaqtigiiinni meeqqat kinguaassiutitigut atornerlunneqartarnerisa pinaveersaartinneqarnissaat, tamakkulu nalunaarutigineqartarnissaat qulakkeerniarlugu qanoq iliuuseqarsinnaanitta oqallisiginissaa pisariaqarpoq. Tamatumani politiiit inoqarfinni tamani sinniisoqarnissaat pingaaruteqarpoq. Inuiaqtigiiittut innuttaaqataasutullu akisussaaqataaneq annerusoq tigusariaqarparput, meeqqallu kinguaassiutitigut atornerlunneqarsimasinnaanerit aarleqquteqarnerit tamaasa nalunaarutigalugit. Tamannalu inuiaqtigiiinnitta iluani unammilligassatta annersaraat, taamaaliornermi inuunerup sinneranut tarnikkut ikiliisarpoq.

Europarådip kinguaassiutitigut atornerlunneqarnermut illersorneqarnissaq pillugu isumaqtigiiissutaanut ilanngussinnaanermik Naalakkersuisut misissuinissaat Inuit Ataqtigiiinnit kaammattuutigiumavarput.